

Raajanut akitsuutit pillugit Inatsisartut inatsisaata allanngutissaanik Inatsisartut inatsisissaannut siunnersuut.

(Aningaasaqarnermut Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit raajanut akitsuutip naatsorsorneqarneranut tunngaviusup allanngortinneqarnissaanik siunnersuut matumuuna saqqummiuppara.

Siunnersuut 2010-mut aningaasanut inatsimmut atatillugu inatsiserpaaluit suliarineqartut ilagaat, Naalakkersuisullu akitsuutit iluarsiiviginerisigut isertitaqarnerunissamik kissaatigisaannik tunngaveqarluni.

Siunnersuutip nassataraa raajanut akitsuutip naatsorsorneqarnera atuutilissasoq, raajat kiilumut akiat siusinnerusumi 13 koruniusimasoq 11,70 koruuniulerpaat.

Naatsorsueriaaseq atorneqartoq annertunerusumik eqqartussanngilara, oqaatigiinnarluguli, allannguinerup Nunatta karsianut 9 mio. koruuninik amerlanerusunik isertitaqartitsissutaanissaa naatsorsuutigineqartoq.

Naggataatigullu inatsisissatut siunnersuut tassungalu nassuiaatit innersuussutigissavakka.

Taamatut oqaaseqarlunga Naalakkersuisut sinnerlugit siunnersuut Inatsisartunut suliaasangortippara, aammalu Akileraartarnermut Akitsuusiisarnermullu Ataatsimiititaliami suliarineqareernerani aappassaaneerseqarnissaanut ingerlatillugu.